

岭
南
遗
书

嶺南遺書

革除遺事序引

革除遺事何以錄懼湮也諸先正之死嗚呼烈矣大節揭
揭與天日相爲昭何湮乎懼懼史之逸之也逸之矣此其
錄之也何承二聖帝意也太宗文皇帝嘗論諸先正之死
曰彼食其祿自盡其心爾仁宗昭皇帝又曰若方孝儒輩
皆忠臣也肆大胥俾爾宗爾姻婭從輕典且俾畋爾田宅
爾宅毋瀦嗚呼仁哉謂之曰忠臣非有傳則何以示勸故
茲錄之凡以承二聖帝之意也疑以蘄信信以蘄徵信則
不疑徵則益信是編也本莆田宋公端儀革除錄并收張
芹林塾二家然猶有缺焉疑其所旣徵白其所未瑩則有
俟乎後獻君子

革除遺事節本目錄

卷第一

君紀

卷第二

闔宮傳

卷第三

列傳

卷第四

列傳死難

卷第五

列傳死事

卷第六

外傳

革除遺事節本目錄畢

革除遺事節本卷第一

嶺南遺書

香山黃佐才伯撰

革除君紀

革除之禍創肇自君海水載蜚甲觀乃焚赫赫有
命歸我聖文稽齟簡芟糾紛

述君紀第一

建文君

建文君諱允炆懿文皇太子長子也洪武壬申懿文薨時
太祖皇帝春秋高矣御東角門日與羣臣相向泣翰林學
士劉三吾進曰皇嫡長孫旣富于年宜蚤正位以繫天下
之望上命有司擇日行禮九月十三日立爲皇太孫詔曰

曩古列聖相繼馭宇內者首立儲君朕自甲辰立王位戊申卽帝位於今二十九年矣前者操將練兵平天下亂偃天下兵奠生民于田里用心多矣統一以來除姦暴去豪强亦用心多矣爾來蒼顏皓首儲嗣爲重嫡孫允炆以九月十三日冊爲皇太孫奉上下神祇以安民庶詔示臣民想宜知悉二十九年丙子八月詔廷臣重議諸王見東宮禮禮官議曰諸王來朝冕服見天子畢次見東宮已有議定儀其敘家人禮王及東宮俱常服引禮官請王由東華殿東門入至後殿王西向坐東宮東向贊禮官贊四拜王坐受相見禮畢敘坐則東宮正中南向諸王列于東西奏上從之時諸王皆東宮叔父故也然皇太孫幼冲自是諸

王多不心服三十一年戊寅閏五月太祖皇帝崩十六日
宣遺詔皇太孫卽皇帝位詔改明年爲建文元年詔赦天
下追尊懿文皇太子爲孝康皇帝廟號興宗敬懿皇太子
妃常氏爲孝康皇后尊母皇太子妃呂氏爲皇太后葬太
祖高皇帝于孝陵援遺詔止諸王會葬立皇太孫妃馬氏
爲皇后長子文奎爲皇太子封皇弟允熲允熒允熙皆爲
王六月以戶部主事夏原吉爲戶部右侍郎中書舍人蹇
義爲吏部右侍郎召前河南右參議董倫爲禮部侍郎兼
翰林學士漢中府教授方孝孺爲翰林侍講詔行寬政赦
有罪蠲逋租魏國公徐輝祖曹國公李景隆等進秩有差
詔修太祖高皇帝實錄召王景彰爲翰林侍講預修纂而

文學之士楊士奇等皆與焉以戴元禮爲太醫院使八月以陳迪爲禮部尙書九月長星西殞有聲如雷征虜將軍西平侯沐春卒春黔寧昭靖王英之子也鎮雲南七年累征蠻獫有功總四川雲南貴州兵欲盡平其地未及而卒遣祭命官護喪至京復遣祭者再賜諡曰惠襄十一月征南將軍總兵官顧成副總兵宋晟韓觀平五開叛寇師還駐常德遣錦衣指揮談全諭班師是歲加兵親藩之不靖者洪武三十二年卽革除建文元年春正月庚寅大祀天地還宮御正殿受羣臣賀詔養老賜高年米肉絮帛命官贖民之鬻子減民田租遣使者問民疾苦駙馬都尉郭鎮卒鎮武定侯英之子也尙永嘉大長公主時奉命賞遼東兵途中

得疾至京師卒斂及葬皆遣官賜祭命右軍都督僉事宋晟至甘肅二月幸太學祀先師孔子詔求賢以張昺爲北平布政司左布政使時周齊湘代岷五府相繼煽動故遣昺鎮燕詔戶部右侍郎夏原吉等二十四人充採訪使分巡直隸十四省原吉巡撫福建所過郡邑明公寬大人咸悅服邑庠生楊子榮一見器之期冠秋試已而果然子榮後名榮爲名臣世稱原吉知人原吉尋奉命出鎮蘄州貶監察御史尹昌隆爲福寧知縣四月十五日湘王柏薨擢給事中徐思勉爲山東按察司僉事以嘗充採訪使有勞故也七月靖難師起北平左布政使張昺都指揮謝貴被執昺死之先是諸藩不靖周王被竄湘王聞討自焚薨執

齊王至京邸畱之徙代王于大同岷王于雲南時文廟在燕邸亦被詔讓是月五日北平布政司吏李友直以布政使張昺之情告六月執昺等隨攻奪九門移檄言姦臣齊泰等變亂祖宗成法稱兵殺害親王於是車駕奉天征討而擢友直爲本司右參議使拘收糧米于楊柳青諸處且督大興宛平二縣人夫浚齊化諸門城壕三司官之交搆者旣就擒凡三日城內外悉定王遂遣將張玉朱能等引兵首攻薊州擒都指揮馬宣殺之指揮毛某等降遂取遵化永平密雲駐于灤河上遣曹國公李景隆爲征虜大將軍駙馬都尉李堅爲左副將軍都督甯忠爲右副將軍以抗禦之贈故翰林待制王禕爲翰林院學士諡文節八月

靖難師克雄縣執都督楊松潘忠等乘勝攻真定長興侯
耿炳文帥兵三十萬與戰敗死李堅甯忠等俱被執旣而
安陸侯吳傑軍亦敗九月江陰侯吳高以遼東兵攻圍永
平靖難師敗之高遂棄輜重遁十月遂定大寧都指揮
朱鑑死之都指揮房寬降李景隆攻北平城十一月及王
戰于鄭村壩大敗會城中亦出兵來擊景隆狼狽走十二
月取廣昌是歲右府都督僉事袁義卒義廬州廬江人嘗
征雲南有功徵還陞今官尋卒賜葬祭建省躬殿至是成
殿在乾清坤寧二宮之間爲退朝燕處所居置古書聖訓
於其中以尙父所言丹書之旨夏書所歌聲色宮室之戒
命方孝孺爲銘遼王來朝三十三年

革除建文二年

春正月詔更

定官制以顧成爲都督同知靖難師取蔚州攻圍大同二月梁國公胡顯有罪革爵安置臨襄交通楚王故也甲子詔更都察院爲御史府定御史二十八員舊制都察院與刑部分治刑獄以行寬政斷獄頗簡遂更名如漢制專以糾貪殘舉賢良匡政事宣教化爲職省御史員二十八人務爲忠厚以底治平三月戊辰賜御史衣已巳改詹事府公署爲御史府賜宴于新治改都御史練子寧等御史大夫置左右補闕左右拾遺以諸刑官及御史之省員者爲之又增六部侍中員次尙書詔增王府侍讀員凡王府置賓輔一人侍書一人進對皆稱名而不臣坐論道德王待以客禮賜禮部進士胡廣等一百一十人及第出身有差

廣對冊有親藩陸梁人心不搖等語上親擢爲第一而賜名靖四月李景隆收潰卒號百萬及靖難師戰于白溝河景隆大敗退保濟南時都指揮平安軍亦敗五月靖難師圍濟南至于七月不克乃去以山東參政鐵鉉有卻敵功命翰林檢討陳某齎銀幣賞之吏部主事魯某齎命封鉉三代鉉入謝拜布政使以厯城侯盛庸代李景隆爲征虜大將軍陞鐵鉉爲兵部尙書副之十月靖難師破滄州大將徐凱被執遂進攻東昌十二月盛庸救東昌靖難師戰互有勝負靖難將張玉卒于陣三十四年革除建文三年春正月元旦凝命神寶成告于天地太廟爲文以示遠邇先是上在儲宮嘗夢神人致上帝命授以重寶元年得青玉于

雪山廣袤踰二尺二年正月十一日上將郊祀乘輿出宿齋宮其夕復若有覩於前夢協遂命玉人琢爲大璽方尺六寸九分親定其文曰天命明德表正萬方精一執中宇宙永昌其歲十二月工成奏名曰凝命神寶至是告于上下神祇而藏之東昌奏捷詔褒賞之將士進官有差二月加禮部尙書陳迪太子太保三月諸將及靖難師戰于夾河敗績閏月復戰于藁城亦敗順德大名彰德等郡皆下陞顧成爲右都督尋戰敗降爲王用盛庸平安等戰通州東昌屢次以捷聞詔將士人進一官六月靖難師攻濟寧九月翰林院修撰王艮卒艮有文學上甚重之遣官諭祭十月靖難師克保定西水寨十一月戰楊村靖難將李彬

遁還北平靖難將陳珪破楊村三十五年

革除建文四年

春正月

靖難師克東河東平遂破汶上諸寨設伏淝河敗平安兵
十餘萬已而進戰小河諸將以捷聞是戰也靖難諸將遽
請旋師獨朱能與王意合遂整兵南下靖難師克沛縣知
縣顏瓌死之二月以禮部右侍郎黃觀爲禮部左侍郎遣
募兵四月戰于汴隄齊眉山皆敗復大戰于靈壁縣大敗
副總兵陳暉平安參將馬溥徐真及都指揮三十餘人皆
被執衆皆潰降營寨無復有完者五月靖難師克泗州渡
淮敗盛庸兵遂克盱眙下揚州六月文廟渡江駐金川門
上闔宮自焚遂出走十二日潭王及李景隆開門迎降吏
部尙書張統大理寺左少卿胡閏戶科都給事中龔泰衡

府紀善周是修死之文廟入京師相傳建文君已崩羣臣
勸進命翰林侍講方孝孺草詔孝孺不屈死之禮部右侍
郎黃觀翰林修撰王叔英時募兵在外聞京師已定亦死
之文廟于是俯徇輿情十七日卽皇帝位詔革除建文年
號仍稱洪武復改故皇太子及妃稱皇兄懿文皇太子皇
嫂敬懿皇太子妃建文君及其子皆廢爲建庶人弟吳王
爲吳庶人尋執太常寺卿黃子澄禮部尙書陳迪等責問
不屈俱族誅之刑部尙書鐵鉉等猶主兵餉在外圖爲抗
禦相繼械至俱不屈死或曰建文君之生也頂顱頗偏高
皇帝知其必不終嘗匣以髡緇之具戒之曰必嬰大難乃
發此至是遂爲僧以逃去又曰建文君幼穎能爲詩高皇